



U P U T S T V O
o procedurama za provođenje
prijevremenih izbora za predsjednika Republike Srpske

Sarajevo, august 2025.godine

Na osnovu člana 2.9. stav (1) tačka 2. i člana 14.3 stav (5) Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), te Odluke o raspisivanju i održavanju prijevremenih izbora za predsjednika Republike Srpske, donešenoj na 42. sjednici, broj: 05-1-07-1-751-1/25 od 28.08.2025. godine, Centralna izborna komisija Bosne i Hercegovine je na 42. sjednici, održanoj 28.08.2025. godine, d o n i j e l a

U P U T S T V O

o procedurama za provođenje prijevremenih izbora za predsjednika Republike Srpske

POGLAVLJE I. UVODNE ODREDBE

Član 1. (Predmet)

Uputstvom o procedurama za provođenje prijevremenih izbora za predsjednika Republike Srpske (u daljem tekstu: Uputstvo) utvrđuju se način određivanja rokova i aktivnosti u postupku provođenja prijevremenih izbora za predsjednika Republike Srpske iz reda srpskog naroda (u daljem tekstu: predsjednik RS), način finansiranja izbora, način podnošenja prijave i ovjere političkih stranaka, koalicija i nezavisnih kandidata (u daljem tekstu: politički subjekti) i prijava i ovjera kandidata političkih subjekata, imenovanje predsjednika i članova biračkih odbora, izborna kampanja, medijsko predstavljanje, upis birača u Centralni birački spisak, akreditiranje izbornih posmatrača, uspostava Glavnog centra za brojanje, te provođenje izbora.

Član 2. (Cilj)

Ovo Uputstvo, se donosi sa ciljem osiguranja provođenja prijevremenih izbora za predsjednika RS, a na način i prema postupku utvrđenim Izbornim zakonom BiH, za provedbu redovnih izbora. („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24) (u daljem tekstu: Izborni zakon BiH)

Član 3. (Uputstvo o rokovima i redoslijedu izbornih aktivnosti)

Centralna izborna komisija BiH će rokove izbornih aktivnosti za održavanje prijevremenih izbora za predsjednika RS, utvrditi Uputstvom o rokovima i redoslijedu izbornih aktivnosti za održavanje prijevremenih izbora za predsjednika RS, nakon što se u skladu sa članom 1.2a Izbornog zakona BiH, osiguraju sredstva za provođenje prijevremenih izbora.

Član 4. (Dostava odluke o raspisivanju izbora)

Odluku o raspisivanju prijevremenih izbora za predsjednika RS donosi Centralna izborna komisija Bosne i Hercegovine (u daljem tekstu: Centralna izborna komisija BiH) i dostavlja je Predsjedništvu Bosne i Hercegovine, Parlamentarnoj skupštini Bosne i Hercegovine, Vijeću ministara Bosne i Hercegovine, Predsjedniku i potpredsjednicima Federacije Bosne i Hercegovine, Parlamentu Federacije Bosne i Hercegovine, Kabinetu predsjednika Republike Srpske i potpredsjednicima Republike Srpske, Narodnoj skupštini Republike Srpske, Skupštinama kantona u

Federaciji Bosne i Hercegovine i izbornim komisijama osnovnih izbornih jedinica (u daljem tekstu: izborna komisija) u kojim se provode prijevremeni izbori za predsjednika RS.

POGLAVLJE II. PRIJAVA I OVJERA POLITIČKIH SUBJEKATA I KANDIDATA ZA PRIJEVREMENE IZBORE ZA PREDSEDNIKA RS

Odjeljak A. Uvodne odredbe

Član 5. (Način podnošenja prijave)

(1) Prijava za ovjeru političkog subjekta, kao i prijave ovjerenog kandidata i kandidatskih listi, podnose se elektronski, putem on-line portala Centralne izborne komisije BiH „e-izbori“. Pristup on-line portalu se ostvaruje korištenjem bilo kojeg internet-pretraživača koristeći adresu izbornog portala Centralne izborne komisije BiH (<https://eizbori.izbori.ba>) na način propisan Uputstvom o postupku dostavljanja, prijema, obrade i arhiviranja prijava političkog subjekta elektronskim putem broj: 05-1-02-2-595-1/24 od 03.05.2024. godine.

(2) Ukoliko elektronski način prijave za ovjeru političkih subjekata iz stava (1) ovog člana, ne bude dostupan prijave se podnose neposredno u sjedište Centralne izborne komisije BiH u propisanom roku za dostavu prijava, na obrascima koji su sastavni dio ovog Uputstva, o čemu se sačinjava zapisnik.

Član 6. (Određivanje šifre)

U svrhu vođenja evidencije o prijavama političkih subjekata za ovjeru učešća na izborima, Centralna izborna komisija BiH određuje posebne šifre s ciljem informatičke i statističke obrade podataka za političke subjekte koji podnesu prijavu za ovjeru za učešće na prijevremenim izborima za predsjednika RS, za one političke subjekte koji do sada nisu imali ovu šifru.

Odjeljak B. Prijava i ovjera političkih stranaka i nezavisnih kandidata

Član 7. (Rokovi za prijavu)

(1) Prijava političkih stranaka i nezavisnih kandidata za učešće na prijevremenim izborima za predsjednika RS podnosi se najkasnije u roku od pet dana od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.

(2) Rok iz stava (1) ovog člana, računa se od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.

(3) Ako Centralna izborna komisija BiH ustanovi da su podaci iz prijave netačni ili nepotpuni, obavještava podnosioca prijave iz stava (1) ovog člana, koji je dužan ispraviti nepravilnosti u roku od dva dana od dana prijema obavještenja. Nakon isteka ovog roka, Centralna izborna komisija BiH odlučuje o tome da li će potvrditi ili odbiti prijavu političke stranke i nezavisnog kandidata za učešće na prijevremenim izborima.

Član 8. (Prijava političkih stranaka koje su učestvovalе na redovnim izborima za predsjednika RS)

(1) Političke stranke koje su bile ovjerene za učešće na redovnim izborima za predsjednika i potpredsjednike Republike Srpske 2022. godine, ne moraju ponovno podnositi cjelokupnu dokumentaciju za ovjeru učešća na prijevremenim izborima za predsjednika RS, već se prijava sa dokumentacijom, koja je podnesena za redovne izbore za predsjednika RS, prihvaća uz podnošenje novog popunjenog obrasca njihove prijave za ovjeru učešća na prijevremenim izborima, novog posebnog računa za finansiranje troškova izborne kampanje i izvještaja o prometu posebnog računa za finansiranje troškova izborne kampanje.

(2) Političke stranke koje su ovjerene na redovnim izborima za predsjednika i potpredsjednike Republike Srpske 2022. godine kao i političke stranke članice koalicije, nisu obavezne uplatiti taksu za učešće na prijevremenim izborima za predsjednika RS i oslobođene su obaveze prikupljanja potpisa podrške.

(3) Političke stranke koje nisu bile ovjerene za učešće na redovnim izborima za predsjednika i potpredsjednike Republike Srpske 2022. godine, kao i političke stranke članice koalicije bile su ovjerene za Narodnu skupštinu Republike Srpske, nisu u obavezi prikupiti potpise podrške, ali su u obavezi izvršiti uplatu takse za učešće na prijevremenim izborima.

(4) Političke stranke koje su učestvovalе na redovnim izborima za predsjednika i potpredsjednike Republike Srpske 2022. godine, a kod kojih je došlo do statusnih promjena, uz prijavu za učešće na prijevremenim izborima za predsjednika RS, moraju osigurati i ostalu traženu dokumentaciju iz člana 10. ovog Uputstva.

Član 9.

(Prijava nezavisnih kandidata koji su učestvovali na redovnim izborima za predsjednika RS)

(1) Nezavisni kandidati koji su bili ovjereni za učešće na redovnim izborima za predsjednika i potpredsjednike Republike Srpske 2022. godine, za Opće izbore 2022. godine, nisu dužni ponovno podnositi cjelokupnu dokumentaciju za ovjeru učešća na prijevremenim izborima za predsjednika RS, već se prihvaća ranije dostavljena dokumentacija uz podnošenje novog popunjenog obrasca njihove prijave za ovjeru učešća na prijevremenim izborima, posebnog računa za finansiranje troškova izborne kampanje i izvještaja o prometu posebnog računa za finansiranje troškova izborne kampanje.

(2) Nezavisni kandidati iz stava (1) ovog člana, nisu dužni uplatiti taksu, niti prikupljati potpise podrške.

Član 10.

(Prijava političkih stranaka koje nisu učestvovalе na redovnim izborima za predsjednika RS)

Političke stranke koje nisu učestvovalе na redovnim izborima za predsjednika RS, uz prijavu za učešće na prijevremenim izborima, pored tri hiljade (3.000) potpisa podrške, podnose sljedeću dokumentaciju:

- a) rješenje o upisu u registar kod nadležnog organa; ukoliko je rješenje starije od 60 dana dostavljaju izvod iz sudskog registra koji nije stariji od 60 dana, u skladu s članom 4.3 Izbornog zakona BiH;
- b) izjavu propisanu članom 1.6 i 1.13 Izbornog zakona BiH potpisanu od strane predsjednika političkog subjekta čija vjerodostojnost potpisa je potvrđena ovjerom nadležnog organa. Ova izjava može biti potpisana od strane predsjednika političkog subjekta i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH. Prilikom potpisivanja izjave u sjedištu Centralne izborne komisije BiH ovlašteno službeno lice Centralne izborne komisije BiH utvrđuje identitet predsjednika političkog subjekta na osnovu važeće lične isprave iz člana 5.12 stav (4) Izbornog zakona BiH;
- c) dokaz o uplaćenom novčanom iznosu takse za ovjeru u iznosu od 18.000 KM;

- d) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1a Izbornog zakona BiH;
- e) ovjerenu izjavu da nema neizmirenih obaveza po osnovu pravosnažnih i izvršnih odluka o izrečenim novčanim kaznama koje je izrekla Centralna izborna komisija BiH, osim u slučaju da se plaćanje kazne vrši u ratama, u skladu sa Odlukom Centralne izborne komisije BiH;
- f) broj računa za finansiranje izborne kampanje u skladu sa članom 15.1b Izbornog zakona BiH,
- g) Izvještaj o prometu posebnog računa za finansiranje troškova izborne kampanje, u skladu sa članom 15.1d stav (1) Izbornog zakona BiH.

Član 11.

(Prijava nezavisnih kandidata koji nisu učestvovali na redovnim izborima za predsjednika RS)

Nezavisni kandidati koji nisu učestvovali na redovnim izborima za predsjednika RS, uz prijavu za učešće na prijevremenim izborima, pored tri hiljade (3.000) potpisa podrške, podnose sljedeću dokumentaciju:

- a) potpisanu izjavu propisanu članom 1.6 i 1.13 Izbornog zakona BiH čija vjerodostojnost potpisa je potvrđena ovjerom nadležnog organa. Ova izjava može biti potpisana od strane nezavisnog kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH. Prilikom potpisivanja izjave u sjedištu Centralne izborne komisije BiH ovlašteno službeno lice Centralne izborne komisije BiH utvrđuje identitet nezavisnog kandidata na osnovu važeće lične isprave iz člana 5.12 stav (4) Izbornog zakona BiH;
- b) dokaz o uplaćenom novčanom iznosu takse za ovjeru u iznosu od 9.000 KM;
- c) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1a Izbornog zakona BiH;
- d) ovjerenu izjavu da nema neizmirenih obaveza po osnovu pravosnažnih i izvršnih odluka o izrečenim novčanim kaznama koje je izrekla Centralna izborna komisija BiH, osim u slučaju da se plaćanje kazne vrši u ratama, u skladu sa Odlukom Centralne izborne komisije BiH;
- e) broj računa za finansiranje izborne kampanje u skladu sa članom 15.1b Izbornog zakona BiH i
- f) Izvještaj o prometu posebnog računa za finansiranje troškova izborne kampanje, u skladu sa članom 15.1d stav (1) Izbornog zakona BiH.

Član 12.

(Visina takse za ovjeru)

(1) Taksa za ovjeru prijave političkog subjekta za učešće na prijevremenim izborima za predsjednika RS određuje se u visini novčanog iznosa, kako slijedi:

- a) Političke stranke - 18.000 KM
- b) Nezavisni kandidati - 9.000 KM

(2) Političke stranke i nezavisni kandidati obavezni su novčani iznos takse za ovjeru iz stava (1) ovog člana, uplatiti sa svog transakcijskog računa koji će se namjenski koristiti za izbornu kampanju tokom prijevremenih izbora za predsjednika RS, na dodatni račun Jedinostvenog računa trezora kod Centralne banke BiH – Centralna izborna komisija BiH broj: 0000030000000145, poziv na broj: 37111614, svrha uplate – takse za učešće na izborima.

(3) Političkoj stranci, nezavisnom kandidatu ili političkim strankama članicama koalicije, čiji kandidat osvoji mandat ili čiji kandidat osvoji 1/3 glasova u odnosu na kandidata koji je osvojio mandat, a politički subjekt je uplatio taksu za učešće na prijevremenim izborima za predsjednika RS, vraća se iznos za taksu za ovjeru učešća na izborima.

(4) Centralna izborna komisija BiH pokrenut će proceduru povrata novca kod nadležnog organa u roku od 15 dana od dana objave izbornih rezultata u službenim glasilima u Bosni i Hercegovini.

(5) Sredstva koja ne budu vraćena političkim subjektima po osnovama navedenim u ovom članu, postaju prihod budžeta institucija Bosne i Hercegovine i međunarodnih obaveza Bosne i Hercegovine.

Član 13.

(Način prikupljanja i unosa potpisa podrške političkih stranaka i nezavisnih kandidata koji nisu učestvovali na redovnim izborima za predsjednika RS)

(1) Da bi se ovjerili za učešće na izborima, politička stranka ili nezavisni kandidat moraju podnijeti Centralnoj izbornoj komisiji BiH prijavu za učestvovanje na izborima, koja sadrži najmanje tri hiljade (3.000) potpisa birača upisanih u Centralni birački spisak.

(2) Potpise podrške prikuplja lice zaduženo za prikupljanje potpisa podrške i koje je odgovorno za vjerodostojnost prikupljenih potpisa birača koji podržavaju prijavu političke stranke ili nezavisnog kandidata (u daljem tekstu: potpisi podrške) prikupljaju se na obrascu koji je sastavni dio ovog Uputstva, koji se preuzimaju i štampaju putem online portala e-izbori ili se preuzimaju u Centralnoj izbornoj komisiji BiH ukoliko aplikacija za podnošenje prijave ne bude dostupna.

(3) Prikupljanje potpisa podrške birača koji podržavaju prijavu političke stranke ili nezavisnog kandidata vrši politička stranka ili nezavisni kandidat, ličnim unosom podataka o biraču u obrascu i svojeručnim potpisivanjem birača u rubriku za potpis.

(4) Obrazac obavezno sadrži podatke o licu koje je odgovorno za prikupljanje potpisa podrške, koje je dužno voditi računa da potpis birača mora odgovarati potpisu sa identifikacionog dokumenta, u skladu sa članom 5.13 stav (2) Izbornog zakona BiH.

(5) Nakon prikupljenih potpisa podrške, lice zaduženo za prikupljanje potpisa obavezno upisuje ukupan broj potpisa na toj strani i potpisuje se na svaku stranicu obrasca. Ukoliko se ne unesu podaci o licu koje je prikupljalo potpise podrške, potpisi koji se nalaze na toj strani bit će odbijeni.

(6) Prikupljene potpise podrške birača koji podržavaju prijavu političke stranke ili nezavisnog kandidata, ovlašteno lice političke stranke ili nezavisnog kandidata obavezno unosi putem on-line portala e-Izbori na dalju obradu i provjeru u skladu sa Uputstvom o postupku dostavljanja, prijema, obrade i arhiviranja prijave političkog subjekta elektronskim putem ili predaje Centralnoj izbornoj komisiji BiH neposredno uz prijavu za ovjeru ukoliko aplikacija za podnošenje prijave ne bude dostupna.

(7) Politička stranka je dužna svojim aktom zadužiti lice koje će prikupljati potpise podrške, koje je odgovorno za tačnost i vjerodostojnost potpisa i po zahtjevu Centralne izborne komisije BiH dužna je dostaviti predmetni akt.

Član 14.

(Oslobađanje od obaveze prikupljanja potpisa podrške)

(1) Politička stranka oslobođena je obaveze prikupljanja potpisa u slučaju kada se podnosi prijava za ovjeru kandidature za organ koji je na istom ili nižem nivou od organa u kojem član političke stranke ima mandat.

(2) Ako je mandat osvojila koalicija ili lista nezavisnih kandidata na Općim izborima 2022. godine, smatra se da je svaka politička stranka članica te koalicije ili svaki nezavisni kandidat na listi nezavisnih kandidata osvojio mandat i oslobođeni su obaveze prikupljanja potpisa podrške.

Član 15.

(Način provjere potpisa podrške prilikom elektronske prijave)

(1) Provjera potpisa podrške iz člana 4.4 stav (5) Izbornog zakona BiH obuhvata sljedeće radnje i postupke:

- a) da li je politička stranka ili nezavisni kandidat dostavio originalni obrazac sa potpisima podrške birača i da li je identičan priloženom e-dokumentu,
- b) usporedbom unesenih podataka putem on-line portala e-Izbori i podataka iz Centralnog biračkog spiska (podatka o JMB i izbornoj jedinici za koju birač ima pravo glasa), odnosno da li je birač koji podržava političku stranku ili nezavisnog kandidata upisan u Centralni birački spisak za glasanje za izbornu jedinicu za koju se podnosi prijava za učešće na izborima,
- c) da li je birač već dao potpis podrške za drugu političku stranku ili nezavisnog kandidata,
- d) da li je unesen utvrđeni broj ispravnih podataka o potpisima podrške.

(2) Ukoliko je broj prihvaćenih originalnih potpisa jednak ili veći od broja originalnih potpisa podrške koji se zahtjeva prema odredbama člana 4.4 stav (5) Izbornog zakona BiH, Centralna izborna komisija BiH će prihvatiti potpise podrške političke stranke ili nezavisnog kandidata.

(3) Za potpise podrške za koje se utvrdi da je dalo lice koje nije upisano u Centralni birački spisak kao birač ili nije upisan u izbornoj jedinici za koju se podnose potpisi podrške, potpis će se smatrati nevažećim.

(4) Potpis podrške birača za dvije ili više političkih stranaka ili nezavisnih kandidata će biti prihvaćen samo za političku stranku ili nezavisnog kandidata koji je prvi unio takav potpis putem on-line portala, a smatrat će se nevažećim za sve druge političke stranke ili nezavisne kandidate kojima je dat.

(5) Ukoliko je politička stranka ili nezavisni kandidat dostavio i unio broj potpisa podrške koji se zahtjeva prema odredbi člana 4.4 stav (5) Izbornog zakona BiH, ali isti ne sadrži dovoljan broj ispravnih potpisa podrške utvrđenih na osnovu provjera iz tačke b) i c) ovog člana, dužan je u roku od dva dana od dana prijema obavještenja Centralne izborne komisije BiH otkloniti nepravilnost.

(6) Politička stranka ili nezavisni kandidat koji ne dopuni broj nedostajućih potpisa podrške u predviđenom roku ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za organ za koji je podnesen dovoljan broj validnih potpisa podrške.

(7) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtjevanog broja potpisa propisanih članom 4.4 stav (5) Izbornog zakona BiH ili potpisi nisu u skladu sa članom 5.13 stav (2) Izbornog zakona BiH, neće biti ovjereni za učešće na izborima.

Član 16.

(Način provjere potpisa podrške prilikom neposredne prijave)

(1) Ukoliko se prijava podnosi neposredno u Centralnu izbornu komisiju BiH provjera potpisa podrške iz člana 4.4 stav (5) Izbornog zakona BiH vrši se metodom statističkog uzorka. Veličina statističkog uzorka iznosi 10 % potpisa podrške (deset posto) od ukupnog broja podnesenih potpisa podrške.

- (2) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtijevanog broja potpisa propisanih članom 4.4 stav (5) Izbornog zakona BiH neće ispuniti uvjet za ovjeru, odnosno provjera potpisa podrške će biti izvršena samo za one organe za koje je podnesen dovoljan broj potpisa podrške.
- (3) Za političke stranke i nezavisne kandidate koji ispunjavaju uvjet iz stava (2) ovog člana, koji su uz prijavu podnijeli zahtijevani broj potpisa propisanih članom 4.4 stav (5) Izbornog zakona BiH označit će se određeni uzorak potpisa podrške koji će se provjeravati, vodeći računa da uzorak bude ravnomjerno raspoređen među dostavljenim potpisima podrške. Centralna izborna komisija BiH će formirati bazu podataka za provjeru koja će sadržavati: naziv političke stranke ili nezavisnog kandidata, ime i prezime potpisnika i jedinstveni matični broj potpisnika.
- (4) Prvom provjerom se utvrđuje da li je birač dao svoj potpis podrške za dvije ili više političkih stranaka ili nezavisnih kandidata. Ako budu utvrđeni takvi slučajevi, potpis će se smatrati nevažećim za sve političke stranke ili nezavisne kandidate kojima je dat.
- (5) Potpisi podrške provjeravat će se usporedbom unesenih podataka iz stava (3) ovog člana i podataka iz Centralnog biračkog spiska (podatka o JMB i izornoj jedinici za koju birač ima pravo glasa),
- (6) Potpisi podrške koje podnosi nezavisni kandidat provjeravaju se na način da li je birač koji je dao potpis podrške upisan da glasa u izornoj jedinici, za koju je nezavisni kandidat podnio prijavu za učešće na izborima.
- (7) Za potpise podrške za koje se utvrdi da je iste dalo lice koje nije upisano u Centralni birački spisak kao birač shodno stavu (5), odnosno u slučaju nezavisnog kandidata iz stava (6) ovog člana ili u slučaju da potpis podrške nije u skladu s odredbom člana 5.13 stav (2) Izbornog zakona BiH, potpis će se smatrati nevažećim.
- (8) Nakon provjere i dobijenog procenta validnih potpisa na statističkom uzorku, isti će se primijeniti na ukupan broj podnesenih potpisa podrške.
- (9) Ako je broj prihvaćenih originalnih potpisa jednak ili veći od broja originalnih potpisa podrške koji se zahtijeva prema odredbama člana 4.4 stav (5) Izbornog zakona BiH, Centralna izborna komisija BiH će prihvatiti potpise podrške političke stranke ili nezavisnog kandidata.
- (10) Ako je broj prihvaćenih originalnih potpisa podrške na osnovu unesenog statističkog uzorka manji od broja potpisa podrške koji se zahtijeva prema odredbi člana 4.4 stav (5) Izbornog zakona BiH, Centralna izborna komisija BiH će unijeti sve dostavljene potpise podrške, te izvršiti provjeru validnosti svih podnesenih potpisa podrške.
- (11) Ukoliko se i nakon postupka utvrđenog u stavu (8) ovog člana, utvrdi da politička stranka ili nezavisni kandidat nema dovoljan broj potpisa podrške utvrđen u članu 4.4 stav (5) Izbornog zakona BiH, politička stranka ili nezavisni kandidat dužan je u roku od dva dana od dana prijema obavještenja Centralne izborne komisije BiH otkloniti nepravilnost.
- (12) Politička stranka ili nezavisni kandidat koji ne dopuni broj nedostajućih potpisa podrške u roku navedenom u stavu (11) ovog člana ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za organ za koji je podnesen dovoljan broj validnih potpisa podrške.

Član 17.
(Odluka o ovjeri političkih stranaka i nezavisnih kandidata)

- (1) Odluku o ovjeri prijave političkih stranaka i nezavisnih kandidata za učešće na prijevremenim izborima za predsjednika RS donosi Centralna izborna komisija BiH najkasnije u roku od tri dana od dana isteka roka za podnošenje prijava.
- (2) Ovjera prijave nezavisnog kandidata za učešće na prijevremenim izborima za predsjednika RS smatra se i ovjerom kandidata za predsjednika RS u smislu člana 21. ovog Uputstva.
- (3) Podnosioci prijave (političke stranke i nezavisni kandidati) čija prijava za učešće na prijevremenim izborima za predsjednika RS bude odbijena imaju pravo u roku od dva dana od dana prijema odluke iz stava (1) ovog člana, podnijeti Apelacionom odjelu Suda Bosne i Hercegovine žalbu preko Centralne izborne komisije BiH, u skladu sa članom 6.9 stav (1) i stav (2) Izbornog zakona BiH.

Odjeljak C. Prijava i ovjera koalicija

Član 18.
(Prijava koalicija)

- (1) Prijava koalicija za učešće na prijevremenim izborima za predsjednika RS, vrši se najkasnije u roku od 13 dana od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.
- (2) Sve koalicije koje su ovjerene na posljednjim redovnim izborima za predsjednika RS, nisu dužne podnositi cjelokupnu dokumentaciju, već samo podnijeti novi popunjeni obrazac prijave.
- (3) Koalicije koje se formiraju za prijevremene izbore za predsjednika RS podnose prijavu u skladu sa članom 4.12 stav (1) Izbornog zakona BiH.
- (4) Podnošenje prijave za učešće na prijevremenim izborima za predsjednika RS, koalicije vrše elektronski, putem on-line portala Centralne izborne komisije BiH „e-izbori“.
- (5) Ukoliko elektronski način prijave za ovjeru političkih subjekata iz stava (1) ovog člana, ne bude dostupan, prijave se podnose neposredno u sjedište Centralne izborne komisije BiH u propisanom roku za dostavu prijava, na obrascima koji su sastavni dio ovog Uputstva, o čemu se sačinjava zapisnik.
- (6) Uz obrazac prijave, koalicija dostavlja i akt o određivanju ovlaštenog predstavnika koalicije, potpisan od strane svih predsjednika političkih stranaka članica koalicije.
- (7) Ako Centralna izborna komisija BiH ustanovi da su podaci iz prijave netačni ili nepotpuni, o tome obavještava podnosioca prijave za koaliciju, koji je dužan ispraviti nepravilnosti u roku od dva dana od dana prijema obavještenja. Nakon isteka ovog roka, Centralna izborna komisija BiH odlučuje da li će potvrditi ili odbiti prijavu koalicije za učešće na prijevremenim izborima za predsjednika RS.

Član 19.
(Odluka o ovjeri koalicija)

- (1) Odluku o ovjeri koalicija za učešće na prijevremenim izborima za predsjednika RS donosi Centralna izborna komisija BiH, najkasnije u roku od dva dana od dana isteka roka za podnošenje prijava.

(2) Koalicija, čija prijava za učešće na izborima bude odbijena, imaju pravo u roku od dva dana od dana prijema odluke iz stava (1) ovog člana, podnijeti Apelacionom odjelu Suda Bosne i Hercegovine žalbu preko Centralne izborne komisije BiH, u skladu sa članom 6.9 stav (1) i stav (2) Izbornog zakona BiH.

Odjeljak D. Prijava i ovjera kandidata za predsjednika RS

Član 20.

(Prijava kandidata političkih subjekata za predsjednika RS s rokovima)

(1) Pod političkim subjektima, u smislu ovog člana, podrazumijevaju se političke stranke i koalicije.

(2) Ovjereni politički subjekti podnose prijavni obrazac kandidata za predsjednika RS i Izjavu kojom kandidat potvrđuje da nema smetnji za kandidiranje, utvrđenih Izbornim zakonom BiH, u skladu sa članom 17. i članom 19. ovog Uputstva (odluka o ovjeri), najkasnije u roku od 20 dana od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.

(3) Sastavni dio prijavnog obrasca kandidata za predsjednika RS je i Izjava kojom kandidat potvrđuje da nema smetnji za kandidiranje, utvrđenih Izbornim zakonom BiH.

(4) Ako se prilikom provjere kandidata za predsjednika RS utvrdi da ne ispunjava uvjete za kandidiranje propisane članom 4.2 Izbornog zakona BiH ili da dokumentacija nije potpuna, politički subjekt je dužan u roku od dva dana od dana prijema obavještenja o otklanjanju nedostataka ili nepravilnosti, dostaviti Centralnoj izbornoj komisiji BiH prijedlog novog kandidata ili osigurati dodatnu dokumentaciju za kandidata.

Član 21.

(Odluka o ovjeri kandidata za predsjednika RS)

(1) Odluku o ovjeri kandidata za predsjednika RS, za učešće na prijevremenim izborima za predsjednika RS, donosi Centralna izborna komisija BiH najkasnije u roku od deset dana od dana podnošenja prijave političkog subjekta za ovjeru kandidata za predsjednika RS.

(2) Centralna izborna komisija BiH će odbaciti kao nedopuštenu, prijavu podnesenu od kandidata koji ne pripada konstitutivnom narodu iz kojeg se bira predsjednik RS.

Član 22.

(Brisanje imena kandidata sa glasačkog listića)

(1) Ako se u periodu od donošenja odluke o ovjeri kandidata do početka štampanja glasačkog listića utvrdi da je kandidat u tom vremenu postao nepodoban za kandidaturu u smislu Izbornog zakona BiH ili u slučaju smrti kandidata, ime kandidata neće biti stavljeno na glasački listić, a politički subjekt može izvršiti zamjenu kandidata do dana štampanja glasačkih listića.

(2) U slučaju iz stava (1) ovog člana, koji je nastao nakon štampanja glasačkih listića, Centralna izborna komisija BiH će putem biračkih odbora obavijestiti birače da za navedenog kandidata ne mogu glasati, te da će ukoliko budu glasali za tog kandidata glasački listić biti nevažeći.

Član 23.

(Propisani obrasci i ovlašteni potpisi)

(1) Prijave političkih subjekata vrše se na obrascima koje je propisala Centralna izborna komisija BiH i oni su sastavni dio ovog Uputstva.

- (2) Obrasce prijave moraju potpisati lica ovlaštena za zastupanje političkog subjekta. U slučaju koalicije, obrasce potpisuju predsjednici svih stranaka članica koalicije.
- (3) Dokumente koje nije potpisao ovlašten predstavnik političkog subjekta, Centralna izborna komisija BiH neće razmatrati.
- (4) Usmenu i pismenu komunikaciju s političkim subjektima Centralna izborna komisija BiH obavlja isključivo preko lica ovlaštenih za zastupanje pred Centralnom izbornom komisijom BiH, navedenih u prijavi za učešće na izborima ili sjedišta glavnog organa političkog subjekta.

POGLAVLJE III. IZBORNA KAMPANJA I MEDIJSKO PREDSTAVLJANJE

Član 24. (Izborna kampanja)

- (1) Izborna kampanja počinje teći 15 dana prije dana održavanja prijevremenih izbora za predsjednika RS.
- (2) Svi politički subjekti koji učestvuju na prijevremenim izborima za predsjednika RS, obavezni su pridržavati se pravila ponašanja utvrđenih Poglavljem 7. Izbornog zakona BiH.
- (3) Izborna šutnja važi za cijelu teritoriju Bosne i Hercegovine, a počinje 24 sata prije otvaranja biračkih mjesta i traje do njihovog zatvaranja.

Član 25. (Medijsko predstavljanje)

- (1) U skladu sa odredbama člana 16.14 stav (1) Izbornog zakona BiH, javni elektronski mediji će ravnopravno i fer predstavljati političke subjekte i informirati javnost u vezi s kampanjom i izbornim procesom u periodu koji počinje 15 dana prije dana održavanja izbora.
- (2) U skladu sa odredbom člana 16.14 stav (2), a izuzetno od odredbe člana 16.15 stav (2) Izbornog zakona BiH, neposredno obraćanje političkih subjekata počinje u periodu od 15 dana prije dana održavanja izbora.
- (3) Izuzetno od odredbe člana 16.12 stav (1) Izbornog zakona BiH, plaćena politička oglašavanja u elektronskim medijima dozvoljena su u periodu od 15 dana prije dana održavanja izbora u trajanju od najviše 30 minuta u privatnim elektronskim medijima i 15 minuta u javnim elektronskim medijima.

POGLAVLJE IV. PROCEDURA AKREDITIRANJA POSMATRAČA

Član 26. (Zahtjev i procedura za izdavanje akreditacija)

- (1) Zahtjev za akreditiranje posmatrača predstavnici političkih subjekata podnose izornoj komisiji u gradu/općini u kojoj se provode prijevremeni izbori za predsjednika RS ili Centralnoj izornoj komisiji BiH, ukoliko se želi posmatrati njen rad, a predstavnici udruženja građana i međunarodnih organizacija prijavu podnose Centralnoj izornoj komisiji BiH u skladu sa odredbama Uputstva o uvjetima i procedurama za akreditiranje izbornih posmatrača u Bosni i Hercegovini („Službeni glasnik BiH“, br. 31/24, Prečišćeni tekst).
- (2) Procedura izdavanja akreditacija provodi se u skladu s odredbama Uputstva iz stava (1) ovog člana.

POGLAVLJE V. UPIS BIRAČA U CENTRALNI BIRAČKI SPISAK I BIRAČKI SPISAK ZA PRIJEVREMENE IZBORE ZA PREDSEDNIKA RS

Član 27.

(Birač upisan u Centralni birački spisak)

- (1) Predsjednika RS biraju birači koji su upisani u Centralni birački spisak da glasaju za jednu od osnovnih izbornih jedinica u Republici Srpskoj lično, u odsustvu, putem pošte ili u DKP-u: (u daljem tekstu: Centralni birački spisak).
- (2) Državljanin BiH koji ima biračko pravo, a ne nalazi se u zaključenom izvodu iz Centralnog biračkog spiska u skladu sa članom 3. 17 Izbornog zakona BiH, podnosi zahtjev Centru za birački spisak koji mu nakon provjere, izdaje potvrdu ovjerenu pečatom izborne komisije i upućuje ga da glasa na biračkom mjestu određenom za glasanje nepotvrđenim – kovertiranim glasačkim listićem.
- (3) Biraču koji ima status raseljenog lica ostaje izražena biračka opcija koju je imao na zadnjim provedenim redovnim izborima.
- (4) Birač koji je bio upisan u Centralni birački spisak na posljednim izborima za glasanje izvan Bosne i Hercegovine (poštom) ima status birača upisanog u Centralni birački spisak za glasanje izvan BiH za prijevremene izbore za predsjednika RS. Uputstvom o rokovima i redoslijedu izbornih aktivnosti za održavanje prijevremenih izbora za predsjednika RS iz člana 2. ovog Uputstva, Centralna izborna komisija BiH utvrđuje krajnji rok za upis novih birača u izvod iz Centralnog biračkog spiska birača koji glasaju izvan Bosne i Hercegovine, za svaki grad/općinu u kojoj se provode prijevremeni izbori za predsjednika RS koji ne može biti kraći od 20 dana od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.
- (5) Državljanin BiH koji ima privremeni boravak ili status izbjeglog lica koji je upisan u Centralni birački spisak, da bi se nalazio na izvodu iz Centralnog biračkog spiska za glasanje izvan BiH, dužan je da podnese elektronsku prijavu za svake izbore kojom se opredjeljuje za glasanje u diplomatsko-konzularnom predstavništvu ili putem pošte, na način utvrđen u članu 3.15 stav (10) Izbornog zakona BiH, Pravilnikom o upotrebi i izradi izvoda iz Centralnog biračkog spiska ("Službeni glasnik BiH" broj 31/24) i Uputstvom o postupku slanja, prijema, obrade, arhiviranja i zaštite elektronskih prijava državljana Bosne i Hercegovine za glasanje izvan BiH elektronskim putem ("Službeni glasnik BiH" broj 31/24, Prečišćeni tekst). Ova procedura se odnosi na one osobe koje tek podnose prijavu za upis u Izvod iz Centralnog biračkog spiska za glasanje izvan Bosne i Hercegovine, a ne na one osobe koje se već nalaze na ovom Izvodu.
- (6) Rok za dostavu podataka o promjeni adrese u inozemstvu i ličnih podataka birača upisanih u Centralni birački spisak na posljednjim izborima za glasanje izvan Bosne i Hercegovine (poštom), ne može biti kraći od 20 dana od dana donošenja Uputstva o rokovima i redoslijedu izbornih aktivnosti za održavanje prijevremenih izbora za predsjednika RS.
- (7) Ukoliko prijava birača izvan BiH ne bude moguća putem aplikacije, Centralna izborna komisija BiH će obrazac prijave za glasanje izvan BiH, koji je sastavni dio ovog Uputstva, za birače koji nisu bili upisani u Centralni birački spisak za glasanje izvan BiH na posljednjim izborima, objaviti na svojoj zvaničnoj web stranici i dostaviti ih svim DKP-ima Bosne i Hercegovine, putem Ministarstva vanjskih poslova Bosne i Hercegovine.
- (8) O načinu prijave birača za glasanje izvan BiH, Centralna izborna komisija BiH će informisati javnost putem svoje internet stranice i/ili na drugi pogodan način.

Član 28.
(Centralni birački spisak)

- (1) Centralni birački spisak se zaključuje 20 dana prije dana održavanja prijevremenih izbora za predsjednika RS.
- (2) Centralna izborna komisija BiH objavljuje broj upisanih birača u Centralni birački spisak za izbor predsjednika RS najkasnije tri dana od dana za zaključenje Centralnog biračkog spiska.
- (3) Centralna izborna komisija BiH izvod iz Centralnog biračkog spiska po biračkim mjestima dostavlja izbornim komisijama sa neosjetljivim izbornim materijalom, najkasnije dvadeset dana prije dana održavanja prijevremenih izbora za predsjednika RS.

POGLAVLJE VI. PROVOĐENJE IZBORA

Član 29.
(Redovna biračka mjesta)

- (1) Prijevremeni izbori za predsjednika RS provode se na redovnim biračkim mjestima koje je odredila izborna komisija na posljednjim provedenim redovnim izborima.
- (2) Izborna komisija koja provodi prijevremene izbore za predsjednika RS obavezna je da prilikom određivanja redovnih biračkih mjesta, odredi jedno biračko mjesto za birače koji glasaju nepotvrđenim glasačkim listićima, a koje će biti pridruženo redovnom biračkom mjestu koje je najbliže sjedištu izborne komisije. Na ovom biračkom mjestu mogu glasati birači koji su upisani u izvod iz Centralnog biračkog spiska da glasaju izvan Bosne i Hercegovine, a koji se na dan održavanja izbora zateknu u svom gradu/općini, kao i birač koji nije upisan u Centralni birački spisak, a koji glasa u skladu sa članom 27 stav (2) ovog Uputstva.
- (3) Izborna komisija obavezna je objaviti lokacije biračkih mjesta u roku od 15 dana prije dana održavanja prijevremenih izbora za predsjednika RS, i o tome obavijestiti Centralnu izbornu komisiju BiH.

Član 30.
(Birači koji su upisani u izvod iz Centralnog biračkog spiska za raseljena lica BiH)

- (1) Birač koji je bio upisan u Centralni birački spisak na posljednjim izborima za raseljena lica BiH, svoje pravo glasanja na prijevremenim izborima za predsjednika RS ostvaruje prema tada izraženoj biračkoj opciji, u skladu sa odredbama člana 20.8 Izbornog zakona BiH.
- (2) Izborna komisija u Federaciji BiH, koja je na zadnje provedenim izborima imala birača koji su glasali u odsustvu za jednu od osnovnih izbornih jedinica u Republici Srpskoj, će odrediti biračko mjesto za glasanje u odsustvu na kojem će ti birači glasati u odsustvu.
- (3) Birači sa prebivalištem u Republici Srpskoj koji su upisani da glasaju u odsustvu za jednu od osnovnih izbornih jedinica u Republici Srpskoj će svoje biračko pravo ostvariti na biračkom mjestu za glasanje lično u osnovnoj izornoj jedinici u kojoj imaju prebivalište.

Član 31.
(Glasanje izvan Bosne i Hercegovine)

Centralna izborna komisija BiH će biračima koji su upisani u izvod iz Centralnog biračkog spiska da glasaju izvan Bosne i Hercegovine na prijevremenim izborima za predsjednika RS, blagovremeno proslijediti potreban glasački materijal sa glasačkim listićima, a najkasnije 25 dana

prije dana održavanja izbora. Prilikom brojanja glasačkih listića uzimaju se u obzir samo oni glasački listići koji su poštom upućeni na adresu Centralne izborne komisije BiH i imaju poštanski pečat na koverti s datumom do dana održavanja prijevremenih izbora za predsjednika RS i koji budu zaprimljeni u Centralnoj izbornoj komisiji BiH najkasnije pet dana od dana održavanja prijevremenih izbora za predsjednika RS.

Član 32. **(Birački odbori)**

(1) Postupak imenovanja biračkih odbora za prijevremene izbore za predsjednika RS vrši se na osnovu odredaba čl. 2.2, 2.3 i 2.19 Izbornog zakona BiH.

(2) Centralna izborna komisija BiH će blagovremeno donijeti odluku o preliminarnom imenovanju predsjednika/zamjenika predsjednika biračkih odbora koji su bili imenovani 2024. godine, za provedbu Lokalnih izbora 2024. godine.

(3) Svi imenovani predsjednici i zamjenici iz stava (2) ovog člana, će biti u obavezi da on-line odnosno putem aplikacije, ili putem izborne komisije ukoliko aplikacija ne bude u funkciji, dostaviti Centralnoj izbornoj komisiji BiH, izjavu o prihvatanju imenovanja na navedenu poziciju i izjavu o ispunjenosti uvjeta iz člana 2.3 i člana 2.19 stav (2) Izbornog zakona BiH.

(4) Na pozicije predsjednika/zamjenika predsjednika biračkog odbora iz stava (2) ovog člana, koji ne dostave izjavu iz stava (3) ovog člana, Centralna izborna komisija BiH će imenovati nedostajućeg predsjednika/zamjenika predsjednika biračkog odbora, na prijedlog izborne komisije, sa rezervnog spiska izborne komisije ili iz reda studenata visokoškolskih ustanova, nezaposlenih osoba koje se vode na evidencijama zavoda za zapošljavanje i zaposlenih u javnoj administraciji.

(5) Pravo predlaganja kandidata za članove biračkih odbora imaju ovjereni politički subjekti za učešće na prijevremenim izborima za predsjednika RS koji imaju kandidata, a koji su na posljednjim Općim izborima 2022. godine, osvojili mandat u Narodnoj skupštini RS. Listu ovjerenih političkih subjekata Centralna izborna komisija BiH dostavlja svim izbornim komisijama u RS i izbornoj komisiji Brčko distrikta BiH.

(6) Izborna komisija je obavezna da postupak žrijebanja, kao i dostavu prijedloga i imenovanja članova biračkih odbora izvrši shodno Pravilniku o postupku imenovanja i razrješenja biračkih odbora za Lokalne izbore u Bosni i Hercegovini 2024. godine („Sl. glasnik BiH“ broj 31/24) i Uputstvu o žrijebanju političkih subjekata za mjesto u biračkom odboru za Lokalne izbore u Bosni i Hercegovini 2024. godine, („Sl. glasnik BiH“ broj 31/24), primjenjujući relevantne odredbe navedenih propisa.

(7) Izborna komisija je obavezna da žrijebanje i dodjelu pozicija političkim subjektima u biračkim mjestima izvrši najkasnije do 30-og dana prije dana održavanja izbora, od kada teče rok od sedam dana da politički subjekti dostave svoje prijedloge za članove biračkog odbora.

(8) Odluke o imenovanju članova biračkih odbora i njihovih zamjenika s obrazloženjem (utvrđeni poredak žrijebanja, imena i prezimena i prijedlog političkog subjekta), izborna komisija, nakon donošenja, dostavlja Centralnoj izbornoj komisiji BiH, a najkasnije u roku od 15 dana prije dana održavanja izbora.

(9) Izborna komisija u FBiH koja formira biračko mjesto za glasanje u odsustvu odmah nakon što dobije podatke od Centralne izborne komisije BiH o političkim subjektima koji su ovjereni za učešće na prijevremenim izborima za predsjednika RS koji imaju ovjerenog kandidata, a najkasnije do 30.-og dana prije dana održavanja izbora, organizira i provodi postupak žrijebanja i dodjele pozicija političkim subjektima u biračkom odboru.

(10) Postupak iz stava (9) ovog člana, izborna komisija provodi u skladu sa odredbama Uputstva o žrijebanju političkih subjekata za mjesto u biračkom odboru za Lokalne izbore u Bosni i Hercegovini 2024. godine.

(11) Izborna komisija će političkim subjektima koji su prisustvovali postupku iz stava (9) ovog člana uručiti zapisnik za izvršenog žrijebanja i dodjele pozicija i ostaviti rok od sedam dana za dostavu prijedloga za članove biračkog odbora, a političkim subjektima koji nisu bili prisutni dostavit će navedeni zapisnik putem e-maila.

(12) Ukoliko politički subjekt ne dostavi svoje prijedloge za članove biračkog odbora, izborna komisija će imenovati članove biračkog odbora iz evidencija članova biračkog odbora sa posljednje provedenih Lokalnih izbora 2024. godine, koji nisu sankcionirani od strane Centralne izborne komisije BiH i koji nisu radili na biračkim mjestima na kojima je bilo ponovno brojanje glasačkih listića.

Član 33.

(Dostavljanje izbornog materijala)

(1) Centralna izborna komisija BiH izborni materijal zajedno sa glasačkim listićima dostavlja nadležnoj izbornoj komisiji u skladu sa članom 7 Pravilnika o provođenju izbora u Bosni i Hercegovini („Službeni glasnik BiH“, broj 31/24).

(2) Birački odbori dostavljaju cjelokupan izborni materijal izbornoj komisiji na način kako je propisano Pravilnikom o provođenju izbora u BiH.

(3) Izborna komisija koja provodi prijevremene izbore za predsjednika RS utvrđuje objedinjene izborne rezultate glasanja koje je provedeno u toj osnovnoj izbornoj jedinici u skladu sa dijelom šest Pravilnika o provođenju izbora u Bosni i Hercegovini.

Član 34.

(Glavni centar za brojanje i kontrola izbornih rezultata)

(1) Centralna izborna komisija BiH će posebnom odlukom formirati Glavni centar za brojanje, imenovati direktora i zamjenike direktora, za prijevremene izbore za predsjednika RS. Istom odlukom utvrđuju se poslovi koji se obavljaju u Glavnom centru za brojanje, lokacija na kojoj se uspostavlja Glavni centar za brojanje i određuje vremenski period u kojem će raditi Glavni centar za brojanje.

(2) Centralna izborna komisija BiH će posebnom odlukom imenovati Glavnog kontrolora, zamjenike kontrolora i kontrolore za prijevremene izbore za predsjednika RS.

Član 35.

(Objava izbornih rezultata)

(1) Preliminarne rezultate prijevremenih izbora za predsjednika RS, Centralna izborna komisija BiH objavljuje u skladu sa odredbom člana 62 i 63 Pravilnika o provođenju izbora u Bosni i Hercegovini.

(2) Centralna izborna komisija BiH utvrđuje i objavljuje izborne rezultate prijevremenih izbora za predsjednika RS nakon objedinjavanja rezultata glasanja s redovnih biračkih mjesta i rezultata dobijenih prebrojavanjem glasova u Glavnom centru za brojanje, i to: glasova iz mobilnih timova, odsustva, biračkih mjesta za glasanje nepotvrđenim-kovertiranim glasačkim listićem, glasovi pristigli putem pošte i iz DKP, najkasnije 20 dana nakon održavanja izbora.

POGLAVLJE VII. ZAVRŠNE ODREDBE

Član 37.
(Računanje rokova)

Neradni dani i dani državnih praznika računaju se u rokove utvrđene ovim Uputstvom za sve izborne radnje.

Član 38.
(Prelazne odredbe)

Za sve ostale radnje, postupke i slučajeve koji nisu regulisani ovim Uputstvom primjenjuju se odredbe Izbornog zakona BiH i podzakonski akti Centralne izborne komisije BiH koji se primjenjuju u postupku redovnih izbora.

Član 39.
(Upotreba izraza u muškom i ženskom rodu)

Riječi koje su radi preglednosti u ovom Uputstvu, navedene u jednom rodu, bez diskriminacije se odnose i na muški i na ženski rod.

Član 40.
(Obrasci)

Sastavni dio ovog Uputstva su:

- a) obrazac prijave za ovjeru političkih subjekata (političke stranke, nezavisnog kandidata, koalicije);
- b) obrazac za prikupljanje potpisa podrške;
- c) obrasci za prijavu kandidatske liste i izjava kandidata;
- d) PRP – obrazac prijave za državljane BiH koji se prijavljuju za glasanje izvan BiH.
- e) obrazac brojnog stanja –prijevremeni izbori za predsjednika RS

Član 41.
(Stupanje na snagu)

Ovo Uputstvo stupa na snagu danom donošenja, a objavit će se u „Službenom glasniku BiH“, „Službenom glasniku RS“, „Službenim novinama FBiH“ i „Službenom glasniku Brčko Distrikta BiH“, kao i na internet stranici Centralne izborne komisije BiH www.izbori.ba.

Broj: 05-1-02-2-753-1/25
Sarajevo, 28.08.2025. godine

Predsjednica
Dr. Irena Hadžiabdić

